

AKASHVANI(AIR)

RNU: KOLKATA

Bengali Text Bulletin

Date 18-03-2026

Time: 7.35 AM

বিশেষ বিশেষ খবর -

১) SIR-এর আওতায় বিচারাধীন তালিকায় থাকা ২০ লক্ষেরও বেশি ভোটদাতার নাম চলতি সপ্তাহেই প্রকাশের আশ্বাস দিয়েছে নির্বাচন কমিশন।

২) পশ্চিমবঙ্গ সহ চারটি রাজ্য ও একটি কেন্দ্রশাসিত অঞ্চলে আসন্ন বিধানসভা নির্বাচন এবং ৬-টি রাজ্যে উপ-নির্বাচনের জন্য মোট ১ হাজার ১১১ জন কেন্দ্রীয় পর্যবেক্ষক নিয়োগ করা হচ্ছে।

৩) আই প্যাকের কর্ণধার প্রতীক জৈনের বাড়ি ও অফিসে তল্লাশির ঘটনায় সুপ্রিম কোর্টে ইডি-র দায়ের করা মামলার আজ আবার শুনানি।

৪) তৃণমূল কংগ্রেসের প্রার্থী তালিকা থেকে ৭৪ জন বর্তমান বিধায়কের নাম বাধ পড়েছে।

প্রার্থী তালিকা প্রকাশের পরই একাধিক জেলা থেকে ক্ষোভ-বিক্ষোভ ও সংঘর্ষের খবর পাওয়া গেছে।

৫) রাজ্যে আসন্ন বিধানসভা নির্বাচনে সিপিআই(এমএল)লিবারেশন বামফ্রন্টের সহযোগী দল হিসেবে ১০-টি আসনে প্রতিদ্বন্দ্বিতা করবে।

০০০০০০০০০০০০০০০০০০০০

SIR-এর আওতায় বিচারাধীন তালিকায় থাকা ২০ লক্ষেরও বেশি ভোটারের নিষ্পত্তি হয়েছে। চলতি সপ্তাহেই সাপ্লিমেন্টারী তালিকা বের করা হতে পারে বলে নির্বাচন কমিশন নিযুক্ত বিশেষ পর্যবেক্ষক সুরত গুপ্ত জানিয়েছেন। হাইকোর্টে গতকাল SIR সংক্রান্ত বৈঠক শেষে তিনি আরো জানান, বিচারাধীন তালিকায় থাকা যে সমস্ত ভোটারের নাম বাদ পড়বে তাদের আবেদন শোনার জন্য সুপ্রিম কোর্টের নির্দেশ অনুযায়ী ট্রাইবুনাল গঠনের ব্যাপারে বৈঠকে আলোচনা হয়েছে। যে সব বিচারকদের নিয়ে এই ট্রাইবুনাল গঠন করা হবে তাদের নাম কলকাতা হাইকোর্টের প্রধান বিচারপতি সুজয় পাল নির্বাচন কমিশনকে জানাবেন।

(বাইট - সুরত গুপ্ত)

রাজ্যের মুখ্য নির্বাচনী আধিকারিক মনোজ কুমার আগরওয়াল জানান, পূর্ণাঙ্গ তালিকা প্রকাশের লক্ষ্যে অত্যন্ত দ্রুত গতিতে কাজ চলছে।

কলকাতা হাইকোর্টের প্রধান বিচারপতি সুজয় পালের নেতৃত্বে আয়োজিত

গতকালের বৈঠকে উপস্থিত ছিলেন রাজ্যের নব নিযুক্ত মুখ্য সচিব দুস্মন্ত নারিয়ালা, রাজ্য পুলিশের নতুন মহা নির্দেশক সিদ্ধিনাথ গুপ্তা, কলকাতার নব নিযুক্ত পুলিশ কমিশনার অজয় কুমার নন্দ, স্বরাষ্ট্র সচিব সংঘমিত্রা ঘোষ প্রমুখ।

০০০০০০০০০০০০০০০০০০০০

পশ্চিমবঙ্গ সহ চারটি রাজ্য ও একটি কেন্দ্রশাসিত অঞ্চলের আসন্ন বিধানসভা নির্বাচন এবং ছটি রাজ্যের উপনির্বাচনের জন্য মোট ১ হাজার ১১১ জন কেন্দ্রীয় পর্যবেক্ষক নিয়োগ করা হচ্ছে। এর মধ্যে এ রাজ্যে সবচেয়ে বেশি সংখ্যক সাধারণ পর্যবেক্ষক মোতায়েন করে নির্বাচন কমিশন। রাজ্যের ২৯৪টি বিধানসভা কেন্দ্রের জন্য ২৯৪ জন

সাধারণ পর্যবেক্ষক থাকছেন। পাশাপাশি থাকবেন ৮৪ জন পুলিশ পর্যবেক্ষক এবং নির্বাচনী খরচের উপর নজরদারির জন্য ১০০ জন ব্যয় পর্যবেক্ষক।

নির্বাচন কমিশন সূত্রে জানানো হয়েছে, পশ্চিমবঙ্গ, আসাম, কেরালা, তামিলনাড়ু ও পুদুচেরির বিধানসভা নির্বাচন এবং ছয়টি রাজ্যের উপনির্বাচন মিলিয়ে মোট ৫৫৭ জন সাধারণ পর্যবেক্ষক, ১৮৮ জন পুলিশ পর্যবেক্ষক এবং ৩৬৬ জন ব্যয় পর্যবেক্ষক দায়িত্ব পালন করবেন। সংশ্লিষ্ট বিধানসভা কেন্দ্রগুলিতে এই পর্যবেক্ষকদের আজকের মধ্যেই পৌঁছে যাওয়ার নির্দেশ দেওয়া হয়েছে। যদিও এ রাজ্যের পুলিশ পর্যবেক্ষকরা গতকাল থেকেই আসতে শুরু করেছেন। সংশ্লিষ্ট কেন্দ্রে পৌঁছে পর্যবেক্ষকেরা তাঁদের সঙ্গে যোগাযোগের বিস্তারিত তথ্য প্রকাশ করবেন, যাতে যেকোনও প্রয়োজনে পর্যবেক্ষকদের সাহায্য পেতে পারেন সকলে। পাশাপাশি প্রতিদিন নির্দিষ্ট সময়ে প্রার্থী, রাজনৈতিক দল বা সাধারণ মানুষের কাছ থেকে নির্বাচন সংক্রান্ত অভিযোগ ও সমস্যা শোনার ব্যবস্থাও রাখা হবে।

এদিকে, পর্যবেক্ষকদের আরো ভালোভাবে ব্যবহার করতে এইবার প্রথম বিশেষ অবজারভার সেল চালু করা হচ্ছে বলে রাজ্যের মুখ্য নির্বাচনী আধিকারিক জানিয়েছেন। একজন আইএএস আধিকারিক এবং চারজন উচ্চপদস্থ ডব্লিউবিসিএস আধিকারিককে নিয়ে তৈরি হচ্ছে ৫ সদস্যের এই বিশেষ সেল। ২৯৪ বিধানসভা আসনে সার্বিকভাবে ভোট প্রক্রিয়াকে রিয়েল টাইম মনিটরিং করার পাশাপাশি পর্যবেক্ষকদের কাজের পর্যালোচনা করা এবং প্রত্যেক বুথে ওয়েবকাস্টিং নিশ্চিত করতে এই সেল কাজ করবে।

০০০০০০০০০০০০০০০০০০০০

নির্বাচন কমিশন গতকাল রাজ্যে ১৯ জন শীর্ষ পুলিশ আধিকারিককে বদলির নির্দেশ দিয়েছে। এডিজি দক্ষিণবঙ্গ, উত্তরবঙ্গ সহ বিভিন্ন জেলার পুলিশ সুপার ও পুলিশ কমিশনারকে বদলি করা হয়েছে। এডিজি দক্ষিণবঙ্গ হিসেবে নিযুক্ত করা হয়েছে, ডক্টর রাজেশ কুমার সিং-কে। এডিজি উত্তরবঙ্গের দায়িত্ব দেওয়া হয়েছে কে জয়া রমনকে।

একই সঙ্গে আসানসোল – দুর্গাপুর পুলিশ কমিশনার হিসেবে ডক্টর প্রণব কুমার, হাওড়ার পুলিশ কমিশনার হিসেবে অখিলেশ কুমারকে নিযুক্ত করা হয়েছে।

অমিত কুমার সিং-কে ব্যারাকপুরের পুলিশ কমিশনার ও সুনীল কুমার যাদবকে চন্দননগরের পুলিশ কমিশনারের দায়িত্ব দেওয়া হয়েছে।

এদিকে, ইন্দিরা মুখোপাধ্যায়কে কলকাতা পুলিশের ডিসি সেন্ট্রাল পদ থেকে সরিয়ে দিয়েছে নির্বাচন কমিশন।

অবিলম্বে এই নির্দেশ কার্যকর করতে এবং এসংক্রান্ত রিপোর্ট আজ সকাল ১১-টার মধ্যে জমা দিতে বলেছে কমিশন।

০০০০০০০০০০০০০০০০০০০০০০

কলকাতায় অবাধ ও স্বচ্ছ নির্বাচন পরিচালনায় তাঁর এবং তাঁর বাহিনীর প্রধান লক্ষ্য বলে নতুন পুলিশ কমিশনার অজয় কুমার নন্দ জানিয়েছেন। গতকাল এক সাংবাদিক বৈঠকে তিনি বলেন, পুলিশ কলকাতার মানুষের নিরাপত্তা নিশ্চিত করতে বদ্ধ পরিকর।

(বাইট – অজয় নন্দ)

০০০০০০০০০০০০০০০০০০০০০

নির্বাচন কমিশন, অবসরের পর পুনরায় নিযুক্ত আধিকারিকদের বিস্তারিত তালিকা চেয়ে রাজ্য সরকারকে চিঠি দিয়েছে। বর্তমানে রাজ্য সরকারের বিভিন্ন দফতরের সঙ্গে যুক্ত প্রাক্তন আই এ এস এবং আইপিএস আধিকারিকদের তথ্যও চাওয়া হয়েছে বলে প্রশাসনিক সূত্রে খবর। কর্মীবর্গ ও প্রশাসনিক সংস্কার দপ্তরকে পাঠানো ওই চিঠিতে যত দ্রুত সম্ভব এসংক্রান্ত রিপোর্ট দিতে নির্দেশ দেওয়া হয়েছে। এরপরই রাজ্যের প্রতিটি দফতর নিজস্ব এবং

ডায়রেটরেটগুলিতে ‘এক্সটেনশন’-এ কর্মরত অবসরপ্রাপ্ত আধিকারিকদের তালিকা তৈরির কাজ শুরু করেছে বলে খবর।

০০০০০০০০০০০০০০০০০০০০০০০০

আজকের প্রসঙ্গে এবারের বিষয় “কানাডার প্রধানমন্ত্রী মার্ক কার্নির ভারত সফর এবং ভারত কানাডা দ্বিপাক্ষিক সম্পর্ক” এই বিষয় নিয়ে কানাডা প্রবাসী ভারতীয় বিজ্ঞানী ডঃ সৈকত বসুর সঙ্গে কথা বলেছেন অভিজিৎ চক্রবর্তী। আজ শুনবেন দ্বিতীয় তথা শেষ পর্ব। অনুষ্ঠানটি শোনা যাবে রাত সাড়ে নটায় গীতাঞ্জলি প্রচার তরঙ্গে, ডিটিএইচ বাংলা পরিষেবা ও আকাশবাণী সংবাদ সোশ্যাল মিডিয়া প্ল্যাটফর্মে।

০০০০০০০০০০০০০০০০০০০০

আইপ্যাক কর্ণধার প্রতীক জৈনের বাড়ি ও অফিসে তল্লাশির ঘটনায় সুপ্রিমকোর্টে ইডির দায়ের করা মামলার আজ আবার শুনানি। বিচারপতি প্রশান্ত কুমার মিশ্রা ও বিচারপতি বিপুল এম পাণ্ডেলির বেঞ্চে মামলার গ্রহণযোগ্যতা নিয়ে প্রশ্ন তুলেছিল রাজ্য। দুই পক্ষের হলফনামা ও জবাবি হাফনামা জমা পড়েছে আদালতে। হলফনামায় রাজ্যের পক্ষ থেকে দাবী করা হয়েছিল, ইডি তল্লাশি করার আগে কোনও নোটিশ দেওয়া হয়নি। ইডি তাদের সীমা লঙ্ঘন করেছে।

অন্যদিকে ইডির পক্ষ থেকে রাজ্যের মুখ্যমন্ত্রী ও তার পুলিশ প্রশাসন ইডির আধিকারিকদের কাজে সহযোগিতা করার পরিবর্তে একাধিক বার বাধা দিয়েছে বলে অভিযোগ করা হয়।।

উল্লেখ্য, চলতি বছরের ৮ জানুয়ারি আই প্যাক সংস্থার কর্ণধারের বাড়িতে ও অফিসে কয়লা কেলেঙ্কারির তদন্তে তল্লাশিতে বাধা দেওয়ার অভিযোগ করে সুপ্রিমকোর্টের দ্বারস্থ হয় ইডি।

০০০০০০০০০০০০০০০০০০০০

তৃণমূল কংগ্রেস রাজ্যে আসন্ন বিধানসভা নির্বাচনের প্রার্থী তালিকা ঘোষণা করেছে। তৃণমূল কংগ্রেস নেত্রী, মুখ্যমন্ত্রী মমতা ব্যানার্জি তাঁর কালীঘাটের বাড়ি থেকে, পাহাড়ের তিনটি আসন অনীত থাপার দল ভারতীয় গোষ্ঠী প্রজাতান্ত্রিক মোর্চাকে ছেড়ে দিয়ে বাকি ২৯১টি আসনে দলীয় প্রার্থীদের নাম গতকাল ঘোষণা করেছেন।

মুখ্যমন্ত্রী মমতা ব্যানার্জী ভবানীপুর কেন্দ্র থেকে প্রতিদ্বন্দ্বিতা করবেন। বিজেপি এই কেন্দ্রে প্রার্থী করেছে বিরোধী দলনেতা শুভেন্দু অধিকারীকে।

৭৪ জন বর্তমান বিধায়ককে এবার প্রার্থী করা হয়নি। ১৩৫ জন বিধায়ক তাদের পুরনো কেন্দ্র থেকেই প্রতিদ্বন্দ্বিতা করবেন। ১৫ জন বিধায়কের আসন পরিবর্তন করা হয়েছে।

সাংবাদিক বৈঠকে দলের সর্বভারতীয় সাধারণ সম্পাদক অভিষেক বন্দ্যোপাধ্যায় ও সভাপতি সুব্রত বস্তুিকে পাশে নিয়ে তৃণমূল কংগ্রেস নেত্রী জানান, শিল্প, সংস্কৃতি, বুদ্ধিজীবী, ক্রীড়া জগতের বিশিষ্টজন সহ সব ক্ষেত্রে মানুষকে প্রার্থী তালিকায় স্থান দেওয়া হয়েছে।

(বাইট-মমতা)

দলের সর্বভারতীয় সাধারণ সম্পাদক অভিষেক বন্দ্যোপাধ্যায় জানিয়েছেন, তৃণমূল কংগ্রেসের প্রার্থী তালিকায় ৫২ জন মহিলা প্রার্থী, ৪৭ জন সংখ্যালঘু প্রতিনিধি রয়েছেন। রাজ্যে ৮৪টি বিধানসভা আসন তপশিলি জাতি-উপজাতির জন্য সংরক্ষিত থাকলেও ৭৮ জন তপশিলি জাতি এবং ১৭ জন উপজাতি প্রার্থী তৃণমূল কংগ্রেসের প্রার্থী তালিকায় স্থান পেয়েছেন।

উল্লেখযোগ্য অন্য প্রার্থীরা হলেন, ব্যারাকপুর কেন্দ্রে রাজ চক্রবর্তী, দমদম উত্তর কেন্দ্রে চল্লিমা ভট্টাচার্য, দমদমে ব্রাত্য বসু, সাগরে বঙ্কিম চন্দ্র হাজারা, বিধাননগরে সুজিত বসু, কামারহাটিতে মদন মিত্র, কলকাতা বন্দরে ফিরহাদ হাকিম, উলুবেড়িয়া পূর্বে ঋতব্রত ব্যানার্জি এবং চুঁচুড়া থেকে দেবাংশু ভট্টাচার্য প্রমুখ।

নন্দীগ্রামে প্রার্থী করা হয়েছে পবিত্র কর-কে। তিনি পূর্ব মেদিনীপুরের বিজেপি-র তমলুক জেলা সংগঠনের সহ সভাপতি ছিলেন। গতকালই তৃণমূল কংগ্রেসে যোগ দেন এই নেতা। ওই কেন্দ্রেও বিজেপি প্রার্থী হয়েছেন, বিরোধী দলনেতা শুভেন্দু অধিকারী।

০০০০০০০০০০০০০০০০০০০

তৃণমূল কংগ্রেসের প্রার্থী তালিকা প্রকাশের পরই একাধিক জেলা থেকে ক্ষোভ,বিক্ষোভ ও সংঘর্ষের খবর পাওয়া গেছে।

পূর্ব বর্ধমানের মন্তেশ্বরে বিধানসভায় প্রাক্তন মন্ত্রী সিদ্দিকুল্লা চৌধুরীর নাম প্রকাশিত হওয়ার পরই মন্তেশ্বরের দীর্ঘনগর গ্রামে সিদ্দিকুল্লা চৌধুরী ও মন্তেশ্বর পঞ্চায়েত সমিতির সভাপতি আহমেদ হোসেন চৌধুরীর অনুগামীদের মধ্যে ব্যাপক সংঘর্ষ শুরু হয়। এলাকায় ব্যাপক উত্তেজনা ছড়ায়। পুলিশ ও কেন্দ্রীয় বাহিনী গিয়ে পরিস্থিতি নিয়ন্ত্রণে আনে।

পূর্ব বর্ধমানের খন্ডঘোষের তৃণমূল কংগ্রেসের প্রার্থী হিসেবে পুনরায় নবীন বাগের নাম ঘোষণা হতেই দলের মধ্যেই বিদ্রোহ। নবীন বাগকে প্রার্থী হিসাবে মানছেন না দলের ব্লক সভাপতি সহ একঝাঁক নেতা। তাঁরা পদত্যাগ করার সিদ্ধান্ত নিয়েছেন।

উত্তর ২৪ পরগনার মিনাখায় প্রার্থী উষারাণী মন্ডলের নাম ঘোষণা হতেই ধুতুরদহ গ্রামে শাসকদলের দুই গোষ্ঠীর মধ্যে বচসা থেকে শুরু হয় ব্যাপক মারধর ও বোমাবাজি। দুই পক্ষের অন্তত ৯ জন গুরুতর জখম হয়েছেন।

এর মধ্য একজন মহিলার অবস্থা আশঙ্কাজনক হওয়ায় কলকাতার আর জি কর হাসপাতালে নিয়ে যাওয়া হয়েছে।

এদিকে, প্রার্থী না করায় তৃণমূল কংগ্রেসের জলপাইগুড়ি জেলার চেয়ারম্যান পদ থেকে পদত্যাগ করলেন জলপাইগুড়ি রাজগঞ্জের বিধানসভা আসনের চারবারের বিধায়ক খগেশ্বর রায়। এই আসনে খগেশ্বর রায় কে সরিয়ে এশিয়াডে সোনা জয়ী স্বপ্না বর্মণ কে প্রার্থী করেছে তৃণমূল। প্রার্থী নিয়ে ক্ষোভ উগড়ে দিয়েছেন তৃণমূল কর্মী সমর্থকেরা।

oooooooooooooooooooooooooooo

ৰাজ্যে আসন্ন বিধানসভা নিৰ্বাচনে CPI(ML) Liberation ১০ টি আসনে
 প্রতিদ্বন্দ্বিতা করার সিদ্ধান্ত নিয়েছে। ফাঁসিদেওয়া , ভরতপুর, বহরমপুর, কৃষ্ণনগর দক্ষিণ,
 নৈহাটি, বজবজ, রাসবিহারী, ধনেখালি, বিষ্ণুপুর, পূৰ্বস্থলী দক্ষিণ এই দশটি কেন্দ্ৰে
 লিবারেশন লড়াই করবে বলে দলের ৰাজ্য সম্পাদক অভিজিৎ মজুমদার জানিয়েছেন।
 এবাৰেৰ নিৰ্বাচনে সিপিআই(ML) Liberation বামফ্রন্টের সহযোগী হিসেবে লড়াই করছে।
 এপ্রসঙ্গে অভিজিৎ বাবু বলেন, বামফ্রন্টের চেয়ারম্যান বিমান বসু ও সিপিআইএম এর শীৰ্ষ
 নেতৃত্বের সঙ্গে ধাৰাবাহিক আলোচনা ও সহমতের ভিত্তিতে ১০ কেন্দ্ৰের প্রতিদ্বন্দ্বিতা করার
 সিদ্ধান্ত নেওয়া হয়।

oooooooooooooooooooooooooooo

oooooooooooooooooooooooooooo